

Pemuda PAS: MAS perlu diselamatkan
MalaysiaKini.com
March 1,2012

Pemuda PAS berkata Sistem Penerbangan Malaysia (MAS) mesti diselamatkan daripada terus mengalami kerugian dan sebagai sistem penerbangan utama negara, ia tidak patut dibiarkan gulung tikar.

Ketua penerangannya dewan itu Riduan Mohd Nor (kanan) berkata, MAS mungkin patut belajar dengan syarikat penerbangan lain seperti AirAsia yang jauh lebih muda tetapi mampu membina empayar sendiri.

"Kegagalan MAS bererti kegagalan negara dalam melahirkan syarikat penerbangan bertaraf dunia. Imej negara pula akan jatuh di peringkat antarabangsa kerana gagal mengurus syarikat penerbangannya setanding dengan syarikat penerbangan negara-negara lainnya," katanya.

Beliau bagaimanapun tidak menyatakan dengan jelas bagaimanapun MAS akan diselamatkan.

MAS semalam mencatat kerugian bersih RM2.52 bilion hasil daripada RM13.9 bilion perolehan bagi tahun kewangan berakhir 31 Disember 2011.

Bagi tempoh suku keempat, syarikat penerbangan negara itu merekodkan RM1.28 bilion kerugian bersih, hasil pusing ganti sebanyak RM3.68 bilion, kata Ketua Pegawai Eksekutifnya Ahmad Jauhari Yahya.

malaysia airline mas aircraftDalam kenyataannya hari ini, Pemuda PAS turut mempersoalkan kerugian besar itu dan membangkitkan sama ada ia berpunca dari kelemahan urus tadbir atau strategi perniagaan yang tidak berkesan.

"Keadaan ekonomi global yang tidak berkembang dengan sihat tidak boleh dijadikan alasan mengapa MAS rugi kerana banyak lagi syarikat penerbangan negara serantau mencatat keuntungan yang baik," kata Riduan.

Dengan sinis, Riduan berkata, tiada ertinya mempunyai lapangan terbang bertaraf dunia tetapi syarikat penerbangannya gagal menempatkan diri.

"Rakyat Malaysia pastinya malu apabila mendengar MAS terus mencatat kerugian buat beberapa tahun lagi dan akhirnya terpaksa menggulung tikar dan menyerah kalah.

"Apakah lagi kebanggan rakyat Malaysia pada industri penerbangan negara?" soalnya.